



*Rabu, 20 Desember 2023*  
**Ogen: 1 Samuel 1:7-8**



**Sierceda Ukur**



**H**anna sekalak diberu si tersakiti. Ceda ukurna perbahan igombang Penina, kiduana. Nggeluh i bas kekurangan erbahanca Hanna pe la percaya diri, dengen menukah akap kiduana ncedai ukurna. I bas ngalaken perbeben, secara manusiawi ia pe tangis ras sedak pusuhna. Senembas tekanan batin e ngaruh ku bas dagingna erbahanca la ia bengket man. Raut wajahna pe dem alu baban si mberat, ndele atena rusur. Dingen perbulangenna pe jadi rate ndele. Bage me kecedan ukur nama ngaruh ku bas kula, perilaku ras relasinta ras sekelewetta.

Lit nge lalap dalam iblis erbahanca kita erceda ate. Sabap megati arah pusuh si ceda murah mempengaruhi ku bas si la mehuli. E maka nina i bas 1 Petrus 5:8, *erjaga-jagalah kam, sabap iblis imbangndu e paksa erdalan-dalan ndarami si man jerngemenna*. Metenget kita i bas pusuh si ceda. Mbue kalak salah muat keputusan erkiteken pusuh dem alu kecedan. Kecenderungen kalak si erceda ukur muat teman si seri, e maka banci cedaina pe ukur kalak si deban ntah daramina temanna bergaul si "sada gelombang" si banci jadi radu ras ia gedap i bas kelepaken cara rukur.

Elkana, perbulangen si erkeleng ate man bana. I bas ukurna gulut langa lit pupusna. Lit perhatianna dengen iberekenna cara pandang si lebih sehat man Hanna. *Ma ergan iakapndu aku asa sepuluh anak dilaki?* Enda sada penungkungen si ngataken man Hanna, maka ula penatap ras perkatan kalak sierbanca la kita sejahtera. Kita ras Tuhantalah si nentukan kai si jadi prioritasta nggeluh, kai si utama i bas ukur ras kegeluhenta. Tuhan nggo nebusi kita alu luar biasa. Kai si lit i bas kita ndauh asangken cukup guna jadi dalanta ngataken bujur man Dibata. Asangken erndeale ate erkiteken si la lit bas kita, ermeriah ukurlah erkiteken kai si lit. Lit kinitekenta, lit denga Tuhan ras persuruhenna si ermediate banta.